



Inatsisartunut Ilaasortaq Anthon Frederiksen  
/MAANI

13. marts 2006  
01.28/2007  
Postboks 269  
3900 Nuuk  
Oq/tel +299 34 50 00  
Fax +299 32 47 04  
aapip@gh.gl  
www.nanoq.gl

### **Ningittagarsuit (autoline) saarullinniarnertu pillugit apeqqutit**

Inatsisartut suleriaasianni § 36, imm. 1 naapertorlugu Naalakkersuisunut ukuninnga apeqquteqarputit:

- 1) Sinerissamut qanittumi qalerallinniarnermi, pingaartumik kangerlunni sermik uukkaavilinni ningittagarsuit (autoline)-nik taaneqartartut atorlugit qalerallinniarneq naalakkersuisut qanoq isumaqarfigaat ?
- 2) Saarullinniarnermut atatillugu tunisassiorneq, tunitsiveqartitsinerlu pillugit piareersarneq sumut killippa ?

### **Apeqqummut 1-imut akissut:**

Naalakkersuisut sinerissap qanittuani qalerallinniarnermut TAC-mik ukioq manna aalajangersaareerput. Naalakkersuisut taamaalillutik naatsorsuutigaa aalisarneq siunissami pisassat annertunerpaaffilerlugit killilersorneqalissasoq, aalisarnerlu taanna piujuartitsinissaq tunngavigalugu ingerlanneqassasoq.

Qalerallinniarnermi ningittagarsuarnik atuineq eqqarsaatigalugu Naalakkersuisut isumaqarput Kalaallit Nunaanni aalisarneq sutigut tamatigut naleqqussartariaqartoq, taassuma ataani aalisarnermi atorlut nutaanerit ullutsinnullu naleqquttut atornerisigut. Nunarsuarmi tuniniaavinni aalisakkanik tunisassiat pillugit unamillernerup kinguneraa aalisarneq naammassisaqarnerusinnaanermigut pisariillisaanermigullu ataavartumik naleqqussartariaqarnera. Aatsaat taamaaliornikkut inuussutisarsaiut piffissaq sivilunerusoq eqqarsaatigalugu ingerlatiinnarneqarsinnaavoq.

Teknikki eqqarsaatigalugu ningittagarsuit ningittakkanut nalinginnaasunut sanilliullugu ningittagartaat silinneroqaat. Tamassuma kinguneraa ningittakkat kittorajuinnerit atorneqarneri, taamaalillunilu ningittagaarseriataarsinnaaneq annikillisinneqarsinnaalluni.

Taassuma saniatigut qalerallit ningittakkanik pisat qalerallit qassutinik pisanit pitsaassusaat pitsaaneruvoq.

Naalakkersuisut taamaammat sinerissap qanittuani qalerallinniarnermi ningittagarsuit atorneqarnissaat ajorinngilaat.

Ilanngullugu oqaatigilaassavara kommune nammineq kommuneqarfimmi ningit-tagarsuit atorneqarnissaat pillugu ileqqoreqqusaliussalluni periarfissaqarmat.

**Apeqqummut 2-mut akissut:**

Junip 2006-ip naanerani suleqatigiissitaliortoqarpoq Kalaallit Nunaata imartaani siunissami saarullinniarnermik aqutsinissamut pilersaarusiortussamik. Suleqatigiissitaliaq taanna Aalisarneq pillugu Siunnersuisooqatigiit ataanni pilersinneqarpoq ilaasortaaffigineqarlunilu Aalisarneq pillugu Siunnersuisooqatigiinni ilaasortanik kiisalu saarullinnik pitsaasumik aqutsinissamik soqutigisaqartunit allanit. Suleqatigiissitaliaq maannamut pingasoriarluni ataatsimiissimavoq, ilimagalugulu 2007-ip ingerlanerani saarullinnik aqutsinissamut pilersaarut saqqummiussinnaasallugu. Naalakkersuisut ilimagaat suleqatigiissitaliaq aamma siunissami tunisarsarnerup qanoq ingerlanneqartarnissaanik kiisalu saarullinnik tunisassiorsinnaanerup qanoq aaqquissuunneqarnissaanik siunnersuummik saqqummiussissasoq.

Saarullinnik tunisarneq eqqarsaatigalugu Naalakkersuisut ukiuni kingullerni umiarsuarnik saarullinnik tigooqqaasussanik tunitsiviliisoqartarnissaa akuersissutigisarpaat, sumiiffinni saarullinnik tunisinissamut periarfissaqarfiunngitsuni imaluunniit nunami tunisassiorfiit saarullinnik tigooqqaanissamut periarfissaqannginneranni aalisartut tunitsivissaqarnissaat qulakkeerniarlugu. Naalakkersuisut ilimagaat tamanna 2007-imi nangeqqinneqassasoq.

Inussiarnersumik inuulluaqqusillunga

Finn Karlsen

Aalisarnermut, Piniarnermut Nunalerinermullu Naalakkersuisoq